

(Consillu Makedonarmânjiloru)

Head Office: *Moscopoli / Voskopoje – Curceaua / Korce – Po. Box 54, Korce, Albania*

Donation : ALPHA BANK, Korce / Albania – “Keshili i Armuneve”

IBAN: AL16902411270121230004496263 SWIFT: CRBAALTR

www.makedonarman-council.org e-mail : info@makedonarman-council.org

ADUNAREA ATSEA MARI A ARMÂNJILORU

15-li di Agustu 2010, MUSCOPULI

DIMÂNDARI

Noi,

Armânjilji ditu tuti craturli di iu bânămu, tsi himu vinitis la Adunarea Atsea Mari di Muscopuli, dizvârtitâ tu dzuua di Stâ-Mârii, 2010, tra s-yiurtusimu unâ aleaptâ dzuuâ pisimâ sh-tu idyulu kiro turnarea a noastâ tu aestu locu simbolicu, thimiljiusitu di strâpâpânjilji-a noshtsâ,

Ma s-luyursimu câ anamisa di vecljili populi evropeani, autohtonji tu Balcanu, Armânjilji suntu paradhiymâ di continuitati istoricâ sh-unâ urnechi di bânaticu deadunu cu alanti populi,

Cândâsits câ adzâ, mashi noi, Armânjilji, putemu sâ spunemu dinintea a lumiljei cari sh-tsi himu sh-câ purtâmu unâ ahoryea fortunâ ti ascâparea a tsivilizatsiljei a noastâ,

Minduindalui câ Armânjilji au trâ prota oarâ tu isturia a loru modernâ, shansa tra sâ s-aspunâ a lumiljei cu identitatea a loru dealihea,

Avândalui tu videalâ câ Armânjiloru lâ si pricadi tra sâ s-hârseascâ di tuti ndrepturli siyurâpsiti di nomurli evropeani shi internatsiunali tsi va li tritsemu pi-aradâ: Conventsia Evropeanâ ti Ndrepturli a Omlui (1950); Cundrata ONU tu ligâturâ cu Ndrepturli Tsivili sh’Polititsi (1966); Cundrata-cadru trâ Avigljarea a Minoritâtsloru Natsiunali (1994); Carta Evropeanâ a Limbilor Reghionali icâ Minoritari (1992); Declaratsiunea Universalâ ti Ndrepturli a Omlui (1948);

Declaratsiunea ONU tu ligâturâ cu Ndrepturli a inshiloru tsi tsânu di minoritâtsli natsionali icâ etnitsi, di pisti sh’lingvistitsi (1992),

Ti tuti aesti itii, Consillu Armânjiloru apufuseashti aestâ

DIMÂNDARI

- **Consillu Armânjiloru** caftâ la tuti craturli ditu Balcanu, iu bâneadzâ Armânjilji (Arbinishia, Gârtsia, Rumânia, Ex Ripublica Iugoslavâ Makidunia, Sârbia, Vâryâria) ca factorilji detsizionali, constitutsionali shi autoritâtsli publitsi tsi au borgi tu dumenea ti ndrepturli a omlui s-cilâstiseascâ tra s-asiyuripseascâ tinjisearea, avigljarea shi acrishtearea a yishterilor shi a identitatiljei etnicâ, culturalâ, lingvisticâ shi di pisti a Armânjiloru.
- **Consillu Armânjiloru** caftâ pricânushtearea a Armânjiloru ca populu reghionalu tsi easti autohtonu tu Balcanu.
- **Consillu Armânjiloru** caftâ la tuti craturli ditu Balcanu, iu bâneadzâ Armânjilji, s-ljia unâ apofasi tu noima a nomuriloru evropeani sh-internatsiunali cari siyurâpsescu ndrepturli tsi lâ si pricadu Armânjiloru ca populu reghionalu.
- **Consillu Armânjiloru** caftâ unu dialogu dishcljisu, dimocraticu, cu tuti guvernili a craturiloru balcanitsi, iu bâneadzâ Armânjilji, tra sâ s-aflâ câljiurli trâ yinitorlu a limbâljei sh-a culturâljei armâneascâ, va s-dzâcâ bâgarea a limbâljei tu sculii, mass-media shi bâsearicâ.

Dimândarea apufusitâ adzâ, 15-li di Agustu 2010, Muscopuli, cu furnjia Adunariljei Atsea Mari a Armânjiloru.

tu 15-li di Agustu 2010 / Muscopuli, Arbinishii